



Stefan Gerber, el è il schef-pastizier dal Badrutt's Palace a San Murezzan.

FOTOS MAD

«Particular en tuttas modas e manieras»

San Murezzan: Il Festival per gourmets è a fin

DA GION NUTEGN STGIER / ANR

■ **Cun ina saira da gala en l'hotel Suvretta è la 26avla ediziun dal Festival per gourmets a San Murezzan ida a fin. Sa laschè ir bain han 4200 persunas e quai da diesch cuschiniers da l'Europa e da l'Asia. Ils organisaturs fan ina bilantscha positiva.** Già è il Festival per gourmets 2019 a San Murezzan e conturn istorgia. Danovamain è l'occurrèza culinara stada in vair success. Ils diesch cuschiniers da num e da pum han durant nov dis attratg la simpatia dals numerus visitaders dal Festival per gourmets. Da la partida als 40 events culinars èn stads 4200 mangiabains, bunamain 200 daplì che anc tar l'occurrèza 2018. Il Festival per gourmets en l'Engiadin'Ota s'avanza

adina daplì tar in'occurrèza culinara da renum mundial. En il fratemp ha quella er en l'Asia in bun num ed ils cuschiniers asiats vegnan gugent en il Grischun per pupragnar culinaric ils gourmets internaziunals.

Fabrizio Zanetti è cuntent

La direzzion e coordinaziun da las occurrèzas culinaras ha già quest onn per l'emprima giada *Fabrizio Zanetti*, il schef-cuschinier da l'hotel da luxus Suvretta. Quel pensum ha il cuschinier cun in'experientscha internaziunala surpiglià da *Reto Mathis*, el ch'è stà 25 onns la persuna cun ils buns contacts tar ils stars-cuschiniers da l'entir mund ed er l'um ch'ha già la survista culinara da tut ils events da mangiar durant il festival. Zanetti, el è

fitg cuntent cun il decurs dal festival ed el fa er ina bilantscha fitg positiva da quels nov dis. L'armonia tranter ils cuschiniers dals hotels-partenaris ed ils giasts-cuschiniers saja stada perfetga ed haja contribui fitg bler al success da l'occurrèza. Ultra da quai sajan ils cuschiniers indigens er ids uman bain a pèr cun ils cuschiniers da l'exteriur. Plaschair haja el cunzunt dals blers resuns positivs dals mangiabains da l'entir mund, ha punctuà Zanetti. Proximamain cumenza per el già la tschertga dals cuschiniers per il Festival per gourmets 2020 ch'ha danovamain lieu en il mais da schaner a San Murezzan e conturn.

Stà fitg intgantà

In dals diesch stars-cuschiniers è *Guillaume Galliot*, el ch'ha per sia cuschina tuttina trais stailas da Michelin. El è il schef-cuschinier dal Caprice a Hongkong, in dals megliers restaurants dal mund. Sias aspectativas sajan propi diventadas realitad tar quel event culinar a San Murezzan, ha el ditg. Galliot ha menziunà d'avair udi fitg bler dal Festival per gourmets en l'Engiadin'Ota e già grond plaschair da pudair vegnir en il Grischun. L'occurrèza culinara saja en tuttas modas e manieras singulara e particulara, ha accentuà il star-cuschinier da l'Asia. El saja stà pli che be intgantà da l'event per mangiabains ed engrazia fitg per l'invitaziun.

300 giasts a la Kitchen Party

Il star-cuschinier *Sergio Herman*, el in un cun 20 puncts Gault Millau per sia cuschina eccellente, è da l'avis ch'il Festival per gourmets da San Murezzan e conturn saja il meglier festival per mangiabains da l'entir mund. Da si'opiniun è er il cuschinier enconuscent *Nicolai Norregaard* dal restaurant Kadeau a Kopenhagen, in local cun duas stailas Michelin ed in dals top restaurants dal mund. El saja adina puspè envidà a festivals per gourmets, però in cun uschè bleras culminaziuns sco quel a San Murezzan n'enconuschia el tuttina berg. L'entira ambienta, la collavuraziun, l'amicizia e las ntipadas cun ils visitaders da l'occurrèza, tut saja fitg spezial e singular, ha menziunà Norregaard. A fin è lura l'event culinaric i cun la saira da gala en l'hotel da tschingt stailas Suvretta cun 180 gourmets ch'han sa laschè custar quel spass passa 600 francs per persuna.



Mauro Tauffer (a san.), il schef-cuschinier da l'hotel Kulm a San Murezzan, cun Swen Wassmer, il nov schef-cuschinunz dal Quellenhof a Ragaz Bogn.



Dirk Haltenhof (a san.) è il schef-cuschinier dal Badrutt's Palace. Qua cun Reto Mathis, el ch'è stà 25 onns manader dals events culinars dal festival.



Ina culminaziun da l'occurrèza è stada la Kitchen Party en il Badrutt's Palace.



Be bunas chausas da mangiar durant l'entir festival.



Er schampagn tutga tar l'event culinar.



Blers visitaders han er las degustaziuns da chaschiel attratg.